




# ERIONGET LOKA BIBLE SOCIETY NAKO UGANDA

## Esabiti loka Ebaibuli okaru 2012

**“ NAARAI KOTOMAKENG, KIJARI,  
KILOSI, KIJAI DA”**  
(Aswamisio 17:28)



**ATESO**



## Erionget loka Bible Society nako Uganda

### Esabiti loka Ebaibuli okaru 2012

**Akou Akirot:** Naarai kotomakeng, kijari, kilosi, kijai da'; Aswamisio 17:28

#### Nuegeete

Erai Esabiti loka Ebaibuli ibore yen ejanakin kangolikaru korai Bible Society nako Uganda imorikikina ka Ikanisan nepepe ka Iriongeta luka Ikristayon kes itemonokinete. Erai asubanit na naegolokinere ainapeta nuka ekaru, nu duc ejanakinos osabiti lokiyalet loka aurio naka Yesu Kristo. Epedori ajaun osabiti losodit loka elap loitomonet kaarei arai angeset nake elap kalokitomonet kadiop. Okaru kalo ejaunos asuban nu, **naEsabiti 2/12/2012 aitodol na Esabiti 9/12/2012.**

Kotoma osabiti kalo isinyikokinitai Ikanisan, Iriongeta ka oni nginidiopediope aswam iboro kwape nat

1. Aisialamikin Papa kanuka akirot ke naedaunitai aiwadik, koipone loitegelikina noi
2. Ailip kanuka aswam naiswamai Erionget loka Bible Society.
3. Aisinyikokin imemban luka BSU atacakin isirigin luka emembane kec.
4. Aisinyikokin itunga ice da araun imemban luka BSU.
5. Atukun ainakineta kanuka aingarakina aswam naka Bible Society nako Uganda.
6. Aijukun ainakineta nuetukunitai nejai Bible Society nako Uganda.
7. Aisibedor itunga ajenun aitapoet, aswam ka alosikineta nuka Bible Society.
8. Ajaun ka ailip 8/12/2012 kwape Asabato; ka 4/12/2012 kwape na Esabiti naka esabiti loka Ebaibuli.
9. Aisinyikokin itunga aisiom nuedadikaere kadoketa kere.
10. Arai epedor adumun apak na agwenalar Ibaibulin Okanisan lu ejaunos ailipasinei nuka esabiti loka Ebaibuli.

Itudumikinit Esabiti loka Ebaibuli lo Ikanisan ka itunga kere arereng naitegelikina naka aingarakin arai aigang ka aitopol etwasamae loka Ebaibuli; ejok ngolikristayot kere aiswaun ibore kotoma apak kangin.

Akou akirot naka Esabiti loka Ebaibuli okaru 2012 erai **“kotomakeng, kijari, kilosi, kijai da;” Aswamisio 17:28.** Adol apak naka Ikristayon kere aitogogong adoketaik kec kotoma Ejakait ka Etajaran Yesu Kristo! Mam ibusakinit oni asalakinit ikudiani ka akwapin kwape luemamei amun. Adol apak naka akuan naka Kristo aica kotoma akwap kana; aica naka Ekanisa kanu aitacaun ngini muton kere. Ibusakinit Ikristayon nepepe aimorikikin aitepeg aronis kere naejai alomun amunar ekristayone. Alukutu atiokisio itunga, arai mam itunganan ejaas ka amun naka aitajario naicasit; mam epedori aisialamikin ainapeta nuka Lokasuban. Erai ailip ka amunokosi ebe, isipedo Esabiti loka Ebaibuli loka ekaru 2012 aitudumikin oni arereng kotoma akirotoke naka aijar, alosit ka ajaenena kotoma Ejakait Yesu Kristo, komam iseseni ejautene loilukunit oni.

**AKOU AKIROT: NAARAI KOTOMAKENG, KIJARI, KILOSI, KIJAI****APAARAN NA 1:****Edeke Papawok; nges ageunet ka esange**

Kolimosi, kikeut; Eebo, kinerutu nepepe. Ingai bo kitoduunit ngin ageun kasonya? Ingai bo kilimokinit apengo? Mere eong Ejakait? Emamei ece dimarai eong. Kosesenai, kitajarunos, isangeta kere loka akwap; Naarai arai eong Edeke, emamei ece.

**Isaia 45:21-22**

Ebala Ejakait Edeke ebe, "Arai eong Alupa ka Omega, loejai, ido lokejai, ido loebuni, Lokapedor kere". **Apukokinio 1:8**

"Erai Yesu Kristo ngopengol bian ka lolo,ido kiton ikar kere". **Iburanian 13:8**

"Ingai bo kesubi, kiswama da, Lokenyarauni aturio ameun kageunet? Eong Ejakait, losodit, Ido nepepe ka lokawasia, eong Ngopengol. **Isaia 41:4**

"Ingai bo eputosi keong? Kolimo do, Kitejen kitemonok kanukang. Ingai bo elimorit apengo akiro nuepote? Kitejenut ngun nuejaunete rwaru. Sirikiyonga, karaida akurianar: Mam apengo kalimonokini jo ka aitodianakin? Iraas yesi da ikakajenak. Ejai Edeke ece dimarai eong? Eebo, emamei Atiiba; mam eong ajeni adio da." **Isaia 44:7&8**

**Ilip ebe:**

*Edeke ka Papawok loejai toma akuj, irai jo loijaas ka apedor naka aitajar ka alakun. Icamunit aibironor kosi lolo ido ilungakin mama ijai jo tetere idumuni aingarakinio kon. Ijo loijai kotoma ageunet, ijai kwapekwana ido ibuni ajaun ikar kere. Itudumikinai sio aipikor kotoma nginitionis nairidakinit isio kwape idiopediope, ikalia, atutubeta ka Ekanisa. Kokiror loka Yesu ilipitor AMEN*

**APAARAN NA 2****Asipokin adoketai naka aijar**

*Adau Edeke asipokin ejautene loka aijar kotoma akwap kana, kosodi apesikin akiro ngun toma akirot naiwadikaitai. Ejai ngesi eyait iboro kere kotoma apedorike.*

"Itemari kotaukon ebe, Apedorika ka agogong naka akakan kes kadumakis eong abara na. Konye kiitu ijo Ejakait Ekonideke, naarai nges lokikorakini jo agogong naidumunia abar; tetere iticasi akeitutuket naeyapoikini lukapapakon, kwape ejaar lolo.

**Ikisila 8:17-18**

"Eitabo loloka ikisila sirenyouunenei kaitukukon, konye koomoomeenei nges paaran ka akuar da, tetere iricit aswam kere kwape ejaatar nuiwadikaitai toma: naarai kwanginnges ererengior ekonirot, ikerianaror da. Mere eong kecorak jo? Kicat, kotitingior; sirikikurianar



karaida aiyalongong: naarai ejai EJAKAIT Ekonideke kajo kama ilosenenei kere.

**Yosua 1:8-9**

Kisyalamikinite akonitumun, ijo esapat; kitalakaanar ekonitau kapaarasia nuka akonitumun, kolosenenei korotin luipuda ekonitau, kasesen da naka akonikonye: konye kojen ebe kitubokini rwaru Edeke kanuka ngun kere. **Ekalimonokinan 11:9**

“Kamo eong jo kekatau kere: Okwe, kenyek apaar kaicorakinetakon! **Isabulin 119:10**

“Ilimokini itunga lu ebe, Inera kwanata EJAKAIT ebe: Koany, ebwaik kakonyenekus erot loka aijar, ka erot loka atwanare. **Yeremia 21:8**

“Iraas yesi aica naka akwap. Mam epedori ere aibwaio arai ejai kaju moru. Ido mam itunga inokokinete atala, ka abuburikin ebukit, dimarai ikajakinete ocoget, ecaikini kere luejaas togo. **Matayo 5:14-15**

“Koany, abunit eong atipet, ayauni eropitika da, atacia nginitunganan kwape ejaar akeswam. **Apukokinio 22:12**

**Ilip ebe:**

*Papa Lokapedor loejai toma akuj, ilipi sio mamakon kaiyapepeara kokiror loka Yesu, ebe, kingarakinai sio aijar kwape ejaar akonikorot naiwadikaitai. Karaida ilukunito attiokisio, koinak sio atiting tetera mam ilomari toma adiakar. Ilipi nu kokiror loka Yesu. AMEN*

### APAARAN NA 3

#### Knowing the times and seasons

“Nakeapiki koany ere, komonyak, kobala ebe, Arai kojoni ijo kapaaran kana akiro nukiinakinete ainapakin! Konye kwana ibwaitai kakonyenekon; komam kinyeineta amour naidokokino amour nace; naarai mam ibu kojen apaknaka aanyanariokon”

**Luka 19:41-42, 44b**

“Kobu akirot naka EJAKAIT mama ejai Yeremia, kobala ebe: Inera EJAKAIT kwanata ebe: Arai ipedorete aibil akaitutuket naka apaaran, ka akaitutuket naka akuare, kinye ajaun apaaran ka akuare kapakike; **Yeremia 33:19-20**

Ejai nginibore ekaruke, nginikirot da naejai kwap kakuj ejai apakike. **Ekalimonokinan 3:1** Naarai nginikirot ejaiapakike ka etube; naarai elangirikonito noi etunganan ican. naarai mam ejeni nuejaunos; naarai ingai bo epedori alimokin nges kwape ejaunotor?

**Ekalimonokinan 8:6-7**

Eringa akwap ejai, mam edaunos apakio nuka aiye, ka aisak, aterot ka aibuse, akamu ka aiporo, apaaran ka akuar. **Ageun 8:22**

Konye naadolio apaknaabeit, abu Edeke ijuk Okokuke, lokewuruuni aberu, lokewuruunio koyaito ikisila, tetera elakuni ngul lukeyaito ikisila, tetera oni kitaranium odwe.

**Igalatian 4:4-5**

**Ilip ebe:**

*Papa lokuju, ijo nges itojok apakio ka apaarasia ajaun, ilipi ingarak isio aitasam apakio nuidolonokinete sio ejok. Odumak ikonitunga acoa naisipedori kes alosenen ka jo kotoma apakio nuetioko. Ilipi nu kere kokiror loka Yesu.*



## APAARAN NA 4

### Araut ekengadan ibusakinit jo:-

Araun itunganan yenimunot kotoma nginikirot naedit arai naepol, naarai ngin yenimam emunono kotoma oboro ludidik mam da epedori araut yen munot kotoma oboro luepolok.

Yenimunot kakirot naedit noi, erai yenimunot kakirot naepol; ngin da yeningalai kakirot naedit, eraiyeningalai da kakirot naepol. Aso arai mam yes iraa lumunon kotoma abar naka aingal, ingai bo kisingadikini yesabar nakabeit? Arai mam iraa lumunon kotoma kangul kalueraas luka ice, ingai bo kiinakini yes lueraas lukus ikulepek? **Luka 16:10-12**

Alup eraas nuka EJAKAIT, ka alelebakec; Akwap kere, ka ngul da luiboenenete kotoma. Naarai abu ngesi kosipok toma angolol, Abu kiscat kakalelen. **Isabulin 24:1-2**

Aso do inera nginitunganan kaoni akekiro ilopet kakonyen nuka Edeke. Kanuka ngun kenyeisbobo atubonokin bonik ka bonik, konye aitelekarit kitogogongoto na ebe sirikibwaikis ekomio karaida aituguikinet orot loka onacekon. **Iromayon 14:12-13**

Koomit itunganan sio kwanata, kwape ikejaanakinak luka Kristo, ka ikengadak da luka nukaiyeyea nuka Edeke. Bobo da iburao ikengadak atakan eraas lumunon.

#### **1 Ikorinton 4:1-2**

Kobala Edeke ebe, kasubutu itunganan kotoma aputowok, asimawok: kainakis kes ayait lukecor, ka akweny nuka apak, ka ibaren, ka akwap kere, ka nginibore kere yeneliat kakwap. **Ageun 1:26**

Korimarito ikengarenikinokokus, kononokikinito da; naarai ekwenyete ngul kanuka ajarakus, kwape luinyakunete akirot; tetera iswamaete ngun kaiyalama kwabo mere keidiny; naarai timam ngin kiingarak yes. **Iburanian 13:17**

#### **Ilip ebe:**

*Edeke ka Papa kosi loeperonori ikar kere kotoma akuj, ibuni mamakon kabilakina otauon kosi, kanuka eijal kosi kotoma aswam naka araut ikengadak lumunon. Iduu sio amunamun isuban kon, iboro luebusakinit aidarit ejok imunamun isio. Iteteunai sio, kosodi aituluor sio ikengadak lukajokak kokiror loka Yesu. AMEN*

## APAARAN NA 5

### Ai bo ijai ijo?

Ejok nginikristayat angicakin bon, kosodi amisikin akelosit nepepe ka Kristo.

Konye kongica itunganan ilopet, kosodi konyam nuka emugati, komat da nuka akoli. **1 Ikorinton 11:28**

Kiiras eporoto loka EJAKAIT Edeke itorit omanikor ariripet naka apaaran, kongopata etunganan ka akeberu kakonyen nuka EJAKAIT Edeke kokiding okito lukomanikur. Kiworo EJAKAIT Edeke etunganan kotema nges atiar, Ai bo ijai ijo? **Ageun 3:8-9**

Kodol abua, kopere nen; ido koany, kobu akirot naka EJAKAIT neejai ngesi, kotema nges atiar, Eliya, inyo bo iswamai ijo kane? **1 Ikabakan 19:9**



Naarai atakanu asianut naka Edeke einunit itunga kere aitajario, kituutoori oni ebe, kangeroto amamus ayongit da Edeke, kotoma okar luka kwana, **Tito 2:11-12**

Koany abwoi kokek ekungukungi; arai epupi itunganan kere ekaporoto kongaa da ekek, alomari mamake, amori nepepe kanges, nges da keong **Apukokinio 3:20**

Simon, Simon, koany, engat Satan yes tetere kipiesi kwape kalos. Konye kelipak eong jo kinyek akoniyuun akurwor; ijo da naibelokinor, kitogogong ikoniinacan **Luka 22:31-32**

Aijen naikoni nen kekarunit; Ikiara noi, mam apedori adolokin nges. Ai bo ilosi anyoun komoyokon? Ai bo da akeriari anyoun kokonyenekon? Arai kadoka kuju, ijai ijo nen: Arai apesik akaperit toma Okatwak, koany ijai ijo nen da **Isabulin 139:6-8**

### Ilip ebe:

*Papa lokalaunan loileleba asianut ka aitim, ituri isio ijo naarai ijoko jo, ido akonimin ejaenena ikar kere. Ingarakinai sio aisisiaun aijarakosi kotomakon. Isisianakinai sio ajenun ainapeta kon nuajokak, nuijatatar ijo mama ejaas itunga luisubit jo. Ingarak sio alosenon kotoma akotekon, kokiror loka Yesu ilipitor.*

## APAARAN NA 6

### Alibunet naka aijarawok

Alibunet na ejok ka asipokina na ejok erai aitogogonget na mam ijanga.

Na nges aitejenunet ebe, abu Edeke koinak oni aijar naka ikar kere, ejai da aijar ngin toma Okokuke. Yenejai Okoku, ejai da aijar; yenemamai Okoku loka Edeke emamei aijar.

#### **1 Yokana 5:11-12**

Arai eong emusabibu, iraaas yesi atenu. Yenesalit tomakang, eong da tomakeng, erai ngin araito nuipu, naarai neamamea eong mamipedorete ibore. **Yokana 15:5**

Ayuuni nges, naarai kaminakin eong noi; Ekeuni nges kuju naarai ajenu akakiror. Ajaenena kanges kotoma ocan; Ayuuni nges, etopoolori da. Esimonikini nges aibut naka apaarasia nuipu, Ido etodikini nges akaijar. **Isabulin 91:14-16**

Loisioniei numam adolitekon kere; Loitangaleuni adekesiakon kere. Loelakuni akonijarkotoma amudiaro; Loitanapit jo aboko naka asianut-nakamin ka aitimesia nukajokak. Loisionikini jo luejok; Kosodi akonitumun aiteteun bala emorukalet.

#### **Isabulin 103:3-5**

### Ilip ebe:

*Edeke lokasuban ka Papa kosi, icamunit ebe irai jo alibunet naka aijar naka nginibore kere. Ilipi jo aiteten ka aingarenikin isio kotoma oboro kere luiswamai sio. Kokiror loka Yesu AMEN*

## APAARAN NA 7

### Abuni eong aanyun nges aitodol awasia

Konye ngol, esasedoteneke mam ikoponar, naarai ejaenena ikar kere. Kanuka ngun nges epedoria aitajar cut luepote mama ejai Edeke kotomake, naarai ebusi ngesi apaarasia



kere apuronokin kes. **Iburanian 7:24-25**

Naarai edokuni Ejakait elopet abunore kotoma akuj kaiworo, keporoto loka emalaika lokapolon, ka arupepe naka Edeke. Ngul da luketwakete kotoma Kristo, kes elingete ajarun; kosodi konyet lukijari, lukipaikinit, kiwuruporio nepepe kakes toma odoun, airiamun ka Ejakait toma apak; kwangi kijaenena ka Ejakait apaarasia kere. Aso kitalakanaros bonic kakiro kangun. **1 Isealonikan 4:16-18**

Konye ajeni ebe ejari Ekalakunanika, ido kawasia ebwoi kakwap: kedau amunyoka amudiario kwangin, konye kotoma akuanaka aanyuni Edeke. **Yobu 19:25-26**

Kwape etukonokinere igitun ka aicweikin kakim, ikonakinio nen kawasia naka akwap. Ijukuni Okoku loka etunganan ikemalaikan, etukonokinite kotoma ajakanutuke kere nuituguikinite kere, ka luiswamaete nukepali, ecakakinete oupa loka akim; ejaun kangina aimony ka airiamanakin ikel. Kosodi ecaunete ikadolitok kwape kakolong kotoma ajakanut naka Papakec. Yenejaas aki, kiira. **Matayo 13:40-43**

### Ilip ebe:

*Papa loka apedor kere, ingaingai isio ijo acamun sio ajaenena akonyenekon. Ijeni isio jokan ebe, ibonguni ijo ayangar Ekanisa loemamei amasikinet. Ingarakinai eong da araun ediofet kotoma kec kokiror loka Yesu. AMEN*

## APAARAN NA 8

### Aiyalama naka angetakin ejok

*Idelelei jokan ebe, arai ilosenenei ka Ejakait, ingetakini oni ejok.*

*Abu Ekabaka Daudi ogeu ejok.*

Kosodi Samuel alemun amumwarat naka akinyet, kinyonyoik nges akinyet kokiding oinacanake: kodoik emoyo loka EJAKAIT Daudi kagogong amear kapaaran kangin kaiyatanakin. Konyou Samuel, kolot Rama. **1 Samuel 16:13**

*Abu ngesi itodia ebe nges kwape atumunan mam akuriana amunokin Edeke.*

Kosodi kanen kenyou Epilisitiat, kobu kikunyak airiamakin kaDaudi, kisunya Daudi, kodingirir neejai ajore airiamakin kEpilisitiat. Kirupa Daudi akan oriagike, kolema alicait, kiililil, koporocik, kocam Epilisitiat oreeteke; koloma alicait oreeteke, kibiror ebuburia. Kipiko Daudi kwangin Epilisitiat kaporocet ka alocait, kocam Epilisitiat, koar; konye komamei ekileng kakan naka Daudi. **1 Samuel 17:48-50**

"Mam nges abu ongetak ejok." Kobala Samuel Saul ebe, "Iswama nukabanganut; mam iricit aicorakineta naka EJAKAIT Ekonideke naabu kicorak jo, naarai ti EJAKAIT kicitat akonijakanut okIsirael ikar kere. Konye kwana mam akonijakanut icasi: amou EJAKAIT etunganan loekot, aseu EJAKAIT nges araun ekapolon loeyait iketunga, naarai mam iricit ngin naabu EJAKAIT kicorak jo." **1 Samuel 13:13-14**

Mam Saul abu ogeunite ejok. Konye komuna Saul ekanisa, kolomanari ngolitogo, kidilidiliununei ikiliok ka angor da, kibwaik aidaris. **Aswamisio 8:3**

Konye Saul, kiyatakinite nukaitukurian ka nukair ikesisiaak luka Ejakait, kolot mama ejai losasedotilopeti, **Aswamisio 9:1**



Abu Saul ibelokin kosodi aijar kanuka Ejakait. Konye Saul, nges Paul, kilelebung Emoyo Lokalaunan, konganyak nges akonye, kobala ebe, "Tjo loileleba aimod ka aronis kere, ijo okoku loka Satan, lokasurup loka adolit kere, mam kereka inyeini aitapar irotin luitenara luka Ejakait? Kwana da, koany, ejai akan naka Ejakait mamakon, imudukanar ijo, komam ianyuni akolong adaun apak." Atipet kodoik nges elisina ka amuton, koturiaitoi ka amoot luerikete kakan. **Aswamisio 13:9-11**

Abu Saul iner akejenanut akauloke. Aji ejie lokajokan, adau abolobol, aricit aiyuun. Amear kwana kengadakinitai aboko naka adolit, nakainakini Ejakait, ekatubon loedolit, kapaaran kangin, ido mere eong bon, konye kere da lueminasi atakanunike. **2 Timoteo 4:7-8**

Ngitunganan kere ipudakin Kristo, tetere engetakini ejok. Konye yenemasi akipi nuainakini eong, mam ejaki akur ikar kere; konye akipi nuainakini eong eraunete kotomake atan naka akipi nuibulubulas kiton aijar namam edaun." **Yokana 4:14**

Kalimokis yes akiro ngun tetere ijaunete kainapakin kotomakang. Toma akwapin ejaas yes ican; konye kotitingikis, epiko eong akwapin. **Yokana 16:33**

Kobwo Sakayo, kotema ngesi Ejakait atiar, "Koany, Ejakait, akorakini lukican atutubet naka ikaboro; arai da arodit itunganan idiobore, atacakini irwan aongon. Kotema Yesu nges atiar, "Adolu lolo aitajario togo lo, naarai erai ngesi da okoku loka Aburaam. Luka 19:8-9

Konye kobala papake ikekejaanakinak ebe, Koyangautu atipet anapito naitelekarit aibuses, kitanapa nges; kitanapikis da egilut obokoritike, ka amuka daakejeke; koyangautu da itaok yenirobok koarata, kanyama kalakaros; **Luka 15:22-23**

Ekwenyunete da luipu kangul kaluejotoete kotoma apua naka akwap, ice neejai aijar namam edaun, ice da mama ejaas ileic ka amwangio namam edaun. Ecaunete da ngul lukacoa kwape amwekimwek naka akuj; ngul da luibelokinete luipu mama ejai adolit kwape aacer ikar ka ikar. **Daniel 12:2-3**

#### **Ilipi ebe:**

*Papa lokotoma akuj, amunokosi ejai mama ijai ijo. Kingarakinai tetere isio ipedori angetakin ejok kotoma nginibore kere yeniswamai sio kotoma akwap kana. Ilipi nu kere kokiror loka Yesu AMEN*